



Groupe parlementaire

Här Claude Wiseler
President vun der Deputéiertechamber
19, um Krautmaat
L-1728 Lëtzebuerg

Lëtzebuerg, den 15. Juli 2024


Här President,
esou wéi d'Chamberreglement et virgesäit, bieden ech lech, dës parlamentaresch Fro un d'Madamm Justizminister weiderzeleeden.

Eis ass e Fall zu Ouere komm, bei deem de Schlässer, deen engem Huissier erlaabt, an eng Wunneng eranzekommen, e beträchtleche Schued un zwou Dieren, dorënner enger denkmalgeschützter Dier, verursaacht huet, e Schued, dee wäit iwwer déi geschëlten Zomm erausgaangen ass. De Schlässer gouf weder vum Huissier selwer nach vun de Polizisten, déi present waren, dru gehënnert, dee Schued ze verursaachen.

An deem Zesammenhang géif ech der Regierung gär dës Froe stellen:

- 1) Nieft dem Schlässer begleeden normalerweis een oder zwee Polizisten an een Zeien de Huissier an d'Wunneng. No wéi enge Krittäre ginn de Schlässer, de Polizist/d'Polizistin an den Zeien ausgewielt? Handelt et sech bei de Polizisten ëmmer ëm lokal Polizisten oder kënnen et och Leit vun der Police judiciaire sinn?
- 2) Wat sinn déi spezifesch Aufgabe vum Zeien? Si si vum Gesetz gereegelt?
- 3) Wéi eng Entschiedegung kréien d'Zeie fir hir Presenz?
- 4) Huet den Zeien d'Recht Fotoen oder Videoen op privatem Terrain an an der Wunneng ze maachen?
- 5) Gëtt et eng kloer gesetzlech Reegelung, déi den Ëmfang vun de Schied begrenzt, déi bei der Vollstreckung verursaacht kënnen ginn?
- 6) Wéi gëtt séchergestellt, datt denkmalgeschützt Dieren net onnéideg beschiedegt ginn?
- 7) Besteet d'Méiglechkeet, datt onnéideg grouse Schued, dee verursaacht gëtt, vum Huissier oder Schlässer gedroe muss ginn?
- 8) Wat kënnen déi betraffe Leit maachen, wann se Affer vun onnéideg grousem Schued ginn? Kënnen si eng Plainte maachen? Wa jo, wéi oft ass sou eng Plainte an de leschte 5 Joer gemaach ginn?
- 9) Wier et net noutwenneg, eng ëmfaassend Reform vum Statut vum Huissier ze maachen, fir Tëscheffäll wéi deen uewe beschriwwenen an Zukunft ze vermeiden?

Mat déiwem Respekt,

A handwritten signature in blue ink, consisting of several loops and a long horizontal stroke.

Dan Hardy
Deputierten